

Projek Facelift D'Kuala bakal ubah landskap, ekonomi Kuala Pahang

Sinar Harian (Sentral) 16 Mei 2018 (Rabu) m/s 23

PEKAN - Universiti Malaysia Pahang (UMP) melaksanakan Projek Facelift D' Kuala dalam usaha mengubah wajah dan identiti Kuala Pahang di sini.

Pengerusi Lembaga Pengarah UMP, Datuk Seri Ibrahim Ahmad berkata, Projek Facelift juga diperkenalkan bagi memaknakan kewujudan UMP sebagai salah satu universiti awam di negara ini.

Menurutnya, melalui projek itu, tumpuan diberikan terhadap transformasi fizikal, rumah-rumah kediaman, masyarakat setempat di Kampung Kuala Pahang, sumbangan perabot dan kesedaran kebersihan bagi merealisasikan ungkapan 'Rumahku Syurgaku' dalam erti kata yang sebenarnya.

"Kuala Pahang terletak berhampiran dengan kampus universiti dan seiring dengan pembangunan UMP kita terpacu untuk melakukan beberapa proses transformasi menerusi projek



Pensyarah UMP, Dr. Nor Hanuni Ramli@Said (kiri) menerangkan projek tanaman fertigasi kepada Dr. Daing Nasir.

pembangunan fizikal dan berkongsi kepakaran dengan masyarakat setempat.

"Ini termasuk meningkatkan taraf hidup penduduk dengan aktiviti yang boleh menjana pendapatan keluarga yang kebanyakannya bekerja sebagai nelayan dan mengusahakan hasil laut," katanya.

Beliau berkata, aspek pembangunan minda turut

dilaksanakan dalam isi rumah melalui sesi motivasi, pembangunan ekonomi melalui projek kebun sayur fertigasi, program peningkatan akademik, kemahiran hidup dan menanam sikap peningkatan kebersihan.

Katanya, UMP berkongsi kepakaran menanam sayur-sayuran menggunakan kaedah pertanian fertigasi bagi membantu mereka menjana



Ibrahim dan Dr. Daing Nasir bersama peserta Facelift Kuala Pahang, Nyak Rosnah Othman.

pendapatan terutama semasa musim tengkujuh.

"Melalui program itu, usaha menaik taraf kampung ini termasuk kerja-kerja mengecat rumah penduduk, kerja pembersihan, pengindahan, baik pulih rumah dan pemasangan solar bakal memberi keselesaan kepada penduduk.

"Sehingga kini program dijalankan secara besar-be-

saran dalam memasyarakatkan universiti menerusi pengetahuan dan teknologi membabitkan seramai 61 peserta di Kuala Pahang ini.

"Seterusnya program ini bakal dilaksanakan di Kampung Serun Dalam di Nenas, di sini membabitkan 21 keluarga yang telah dikenal pasti," katanya.

Peserta Facelift Kuala Pahang, Nyak Rosnah Othman

yang kini tinggal di rumah baharu bertuah apabila dipilih sebagai peserta Facelift sekali gus menikmati kehidupan lebih baik.

"Jika sebelum ini kami tinggal di rumah usang tapi sekarang lebih selesa dan ada tiga bilik.

"Saya juga peserta kemahiran empower ECER akan meneruskan perniagaan urutan selepas bersalin dan spa bergerak," katanya.

Sementara itu, bagi Rosli Othman, teknologi fertigasi di halaman kediamannya mampu menambah pendapatan selain akan sedia mengikut kursus meningkatkan produktiviti tanaman.

Program Ziarah Facelift @ Kuala Pahang baru-baru ini turut dihadiri Naib Canselor UMP, Prof. Datuk Seri Ts. Dr. Daing Nasir Ibrahim dan ahli Lembaga Pemegang Amanah MyGift, Datuk Mohd Nizar Mohd Najib dan Ketua Pegawai Operasi Petronas ICT Sdn Bhd, Izwan Hasli Ibrahim.